

مافيش نغير

مانيش لاقى ولا كلمة ..

تاخذني بعيد عن اللمة

وفارد كل كلماتي

قصيدة شعر

تغير للسنين شرايين

ف عز الليل تبان شمسه

وييجي الصبح مع امسه

ونسلم غنوه صباحي

واقول الشعر كما المواويل

ف صدقني أنا شاعر

لكن إحساسي إني أسير

ومتعود علي اني أكون ورق بردي

ومتسطر بلون وردي

ومش قابل ب كون تغيير

أنا التفسير

ف سورة مريم العدرا

واخت هارون

وكانت ف الجبل حبلي

ف جابت لينا أحلى مسيح

ف كون تباريح

و حلمي ع البساط راكب

مع سليمان

مع الحاشية اللي كانت من وراه ماشية

مع الجنى مع الإنسان

عشقت الريح

وجوايا حروف الشعر مكتوبة

كلام مجاريح

يا أطفى مسيح أنا شوفته

معاه الإنجيل

أنا شاعر وبتعلم بحور الشعر

ومتلخبط كأنني في حضرة المساطيل

وتخدعني دموع تماسيح

انا باحلم بحلم نهار

أزور مكة

و انا دي فين صلاح الدين ؟

ووحى قصيدة من تاني ونظرة عين

كأنني أمير

أروح حيفا أروح عكا يا دوب تكة

ما بين الأقصى والتحرير

وابات احلم أقول يمكن

أقابل موسي ف طريقي

يشوف لي ف معبده سكة

وانا طاهر و متوضي

ومالي جيوبي بالفكة

ورغم قسوة المشاوير

مافيش تغيير

وبدعوة وركعتين لله

وجبهة في عز البرد سجده

أتاجي المولي يا الله

علي الأقصى اللي عمره أسير

ف إيد صهيوني متشعبط ف حق الغير

ألاقي نفسي متلخبط ف خط السير

وبرد طوبه اللي كان حاضر ف عز امشير

يخليني كده اتبسم

وحروفي ع الورق ترسم

ضفاير شعر وقصيدة

وليها في الزمان عنوان

مافيش تغيير ... مافيش تغيير